

Morning Dogri (NSD) Bulletin 09-11-2025

आकाशवाणी

1. उत्तराखंड अज्ज अपने गठन दी रजत जयंती मना करदा ऐ, प्रधानमंत्री नरेंद्र मोदी इस मौके उत्थे जाइयै इक यादगारी टिकट जारी ते केई परियोजनाएं दा उद्घाटन करडन।
2. बिहार विधानसभा चुनांस दे दुए गेड़ लेई प्रचार अज्ज संझा खत्म होई जाहग। बक्ख-बक्ख पार्टियें दे लीडर मते शा मते मतदाताएं गी अपने हक्कै च करने लेई अज्ज पूरी टिल्ल लाई देडन।
3. राष्ट्रपति द्रौपदी मुर्मू होर अज्ज लुआंडा च अंगोला दे राष्ट्रपति जोआओ मैनुअल गोजाल्विस लौरेंको हुं' दे नै दपक्खी वार्ता करडन।
4. मौसम विभाग नै अगले 5, 6 दिनें तगर उत्तर पच्छम ते मध्य भारत दे केई इलाकें च रातीं दा तापमान 2 कोला 5 डिग्री झिगड़ा उठी जाने दी पेशगोई कीती ऐ।
5. भारती शतरंज खडारी डी. गुकेश फिडे विश्व कप दे त्रीए गेड़ च बाहर होई गए, प्रजानानंद ते अर्जुन एरिगेसी चौथे दौर च दाखल।

<><><><><><>

PM-Dehradoon

प्रधानमंत्री नरेंद्र मोदी होर अज्ज उत्तराखंड राज्य दे गठन दी रजत जयंती समारोह च हिस्सा लैने लेई देहरादून जाडन। इस मौके पर ओह इक यादगारी डाक टिकट बी जारी करडन। प्रधानमंत्री मोदी करीब 8 जहार करोड़ रपे कोला मती दी लागत आहिलिये बक्ख-बक्ख परियोजनाएं चा किश दा उद्घाटन बी करडन ते केइएं दा नीह पत्थर रक्खडन। इनें परियोजनाएं च सिंचाई, पीने आहले पानी, तकनीकी शिक्षा, उर्जा, शैहरी विकास, खेड ते हुनर विकास समेत होर केई क्षेत्रें दियां परियोजनां शामिल न। प्रधानमंत्री होर इस मौके पी.एम फसल बीमा योजना दे तैहत 28 जहार कोला मते करसानें दे बैंक खातें च 62 करोड़ रपे दी रकम जमा कराडन।

<><><><><><>

Bihar-Compaigning

बिहार विधानसभा चुनांस दे दुए ते खीरी गेड़ दा प्रचार अज्ज संझा खत्म होई जाहग। इस गेड़ च राज्य दे 20 जिलें च फैली दिएं 122 विधानसभा सीटें लेई 11 नवंबर गी वोट पोआए जाडन। इस गेड़ च 3 करोड़ 70 लक्ख कोला मते मतदाता 1 जहार 302 मेदवारें दे सियासी भविक्ख दा फैसला करडन जिंदे च 136 महिला मेदवार बी शामिल न। प्रचार दे खीरी रोज अज्ज एनडीए ते महागठंधन दे केई बड्डे लीडरें चुनांस रैलियें गी संबोधित करिये मते शा मते मतदाताएं गी अपने हक्के च करने लेई अपनी पूरी टिल्ल लाडन। भारती जनता पार्टी दे सीनियर लीडर ते गृह मंत्री अमित शाह होर अज्ज सासाराम ते अरवल

च जनसभाएं गी संबोधित करडन जिसलै के बीजेपी दे सीनियर लीडर राजनाथ सिंह औरंगाबाद ते कैमूर च रैलियां करडन। महागठबंधन लेई अज्ज कांग्रेस दे सीनियर लीडर राहुल गांधी होर पूर्णिया ते किशनगंज च जनसभाएं गी संबोधित करने जा'रदे न।

<><><><><><>

Prez. Africa Visit

राश्ट्रपति द्रौपदी मुर्मू होर कल चिरें राती अफ्रीका दे दउं मुखें दे सरकारी दौरै दे पैहले गेड़ च अंगोला दी राजधानी लुआंडा पुज्जी गेइयां। कुसै भारती राश्ट्र अध्यक्ष दी अंगोला दी एह पैहली यात्रा ऐ। दवें मुख इस बरे अपने राजनयिक सरबंधें दी 40मीं ब'रे गंड मना करदे न। इस ब'रे दौनें मुखें बशकार दुई उच्ची सतह दी बैठक लग्गै करदी ऐ। एहदे शा पैहले नेई म्हीने अंगोला दे राश्ट्रपति दिल्ली आए हे। अज्ज राश्ट्रपति मुर्मू होर लुआंडा स्थित राश्ट्रपति भवन च अंगोला दे राश्ट्रपति जोआओ मैनुअल गोंजाल्विस लौरेंको हुंदे कन्नै दपक्खी गल्लबात करंगन जेदे मगरा दौनें मुखें बशकार आपसी हितें दे मुद्दें कन्नै जुड़े दे केई समझौतें पर दस्तखत होने दी बी मेद ऐ। इस यात्रा दे दुए गेड़ च द्रौपदी मुर्मू 11 कोला 13 नवंबर तोड़ी वोत्सवाना दे दौरै पर रौहडन।

<><><><><><>

IMD-Morning

मौसम विभाग नै पेशगोई कीती ऐ जे अगले 5 शा 6 दिनें तगर उत्तर पच्छम ते ओहदे कन्नेलगदे मध्य भारत दे क्षेत्रे च रातीं दे तापमान च 2 शा 5 डिग्री सेल्यिस दी गिरावट आई सकदी ऐ। विभाग ने सोमवार तगर विदर्भ ते छत्तीसगढ़ दे केई हिस्सें च घट्टोघट्ट तापमान च करीब 2 डिग्री सेल्यिस दी गिरावट दी बी मेद दस्सी ऐ। राजस्थान ते मध्य प्रदेश दे किश हिस्सें च कल सीत लैहर आहली स्थिति बने रौहने दी मेद ऐ।

<><><><><><>

Russia-Ukraine Attach

रूस नै यूक्रेन पर पूरी रात ड्रोन ते मिसाइलें कन्ने हमले कीते न जिंदे च घट्टोघट्ट 7 लोकें दी मौत होई गई ऐ। इनें हमले च 2 एटमी उर्जा दे संयंत्रे दे उपकेंद्रे गी बी नशाना बनाया गेआ ऐ। यूक्रेन दे विदेश मंत्री एंड्री सिबिहा होरे जानकारी दिती ऐ जे एह हमले इक सोची समझी रणनीति तैहत जानी बुज्जियै कीते गेन। उनें आखेआ कि रूस जानी बुज्जियै यूरोप च परमाणु सुरक्षा गी खतरे च पा करदा ऐ।

<><><><><><>

Airforce Show

भारती ब्हाई फौज दी 93में बरेगंड दे समारोहे दे जारी सिलसिले च पूर्वी कमान अज्ज गुवाहाटी च बड्डे पैमाने पर उत्थे पैहले पैहले एयर शो करने जा'रदी ऐ। दिनें साइडे 12 बजे कोला लेइयै 12 बजे तोड़ी चलने आहले इस एयरशो च वायु

सेना गुवाहाटी च ब्रह्मपुत्र नदी दे उप्पर लाहित घाट पर 25 कोला मतिएं संरचनाएं च 75 कोला मते जंगी ज्हाजें ते हैलीकाप्टरें दा प्रदर्शन करग। एह ज्हाज इस क्षेत्र दे 7 ब्हाई अड्डे जिंदे च गुवाहाटी, तेजपुर, जोहाट, छाबुआ, हासीमारा, बागडोगरा ते पानागढ़ शामिल न।

<><><><><><>

India NZ Free Trade

भारत ते न्यूजीलैंड बश्कार मुक्त बपार समझौतें पर चौथे गेड़ दी गल्लबात पूरी होई गेई ऐ। उद्योग ते बपार मंत्रालय नै दस्सेआ ऐ जे वार्ता माल-समेयान ते सेवाएं दे बपार, आर्थिक सहयोग ते उत्पादन दे नियमें जनेह प्रमुख क्षेत्रें पर केंद्रित ही। दौनें पक्खें आखेआ जे चर्चा सकारात्मक रेही जेड़ी दौनें मुल्खें दी इक निग्गर आधुनिक ते संतुलित बपार सांझेदारी दे सांझे लक्ष्यें गी दर्शादी ऐ। मंत्रालय दा आखना ऐ जे उद्योग ते बपार मंत्री पीयूष गोयल ते न्यूजीलैंड दे बपार मंत्री टाड मैक्ले हारें हुनै तगर दी प्रगति दा सुआगत कीता ऐ।

<><><><><><>

Goa-Fide Chess

भारती शतरंज खडारी डी गुकेश फिडे विश्व कप दे त्रीये दौर शा बाहर होई गे न। गुकेश गी कल जर्मनी दे ग्रैंड मास्टर फ्रेडरिक स्वेन कोला हार दा सामना करना पेआ। आर. प्रज्ञानानंद ने होवहानिस्यान रॉबर्ट कोला बाजी जित्तियै चौथे दौर च प्रवेश कीता। दिप्तायन घोष ग्रैब्रियल सर्गिसियन कोला हारियै टूर्नामेंट

शा बाहर होईं गे। अर्जुन एरिगैसी बी उज्जबेकिस्तान दे शमसिद्दीन वोखिदोव
कन्नै डॉ. खेड्ढिए चौथे दौर च पुज्जी गे। पी. हरिकृष्णा ते प्रणव वी बी कल
अपनी-अपनी बाजी ड्रा करने दे कन्नै गै चौथे दौर च पुज्जी गे।

<><><><><><>